

绝妙好辞今辑

张丽娟 校点

绝妙好辞今辑卷上

吴伟业字骏公，号梅村，太仓人。

菩萨蛮

野景

江天漠漠黄云白，长桥客醉闲吹笛。沙嘴荻花秋，垂萝拂钓舟。危岸欹半倚，仄径苍苔展。欲上最高亭，远山无数横。

丑奴儿令

村居

溪桥雨过看新涨，高柳鸣蝉，荷叶田田，指点儿童放鸭船。前村浊酒沽来醉，今夜凉天，明月初圆，一枕西窗自在眠。

临江仙

过嘉定感怀侯研德

苦竹编篱茅覆瓦，海田久废重畊。相逢还说十年兵。寒潮冲破舰，野火起空城。门户凋残宾客在，凄凉诗酒侯生。西风萧飒不胜情。一篇思旧赋，故国与浮名。飒音毅

满江红

过虎丘申文定祠

相国祠堂，看古树、苍厓千尺。听断涧、辘轳声紧，阑干吹笛。士女嬉游灯火乱，君臣际会松杉直。任年年、急雨打荒碑，

儿童识。今古恨，兴亡迹。白社饮，青门客。叹三公旧事，吾徒萧瑟。歌舞好随时世改，溪山到处还堪忆。尽浮生、风月倒今尊，千人石。

木兰花慢

话旧 载百家

西湖花月地，樱笋熟，鳊鱼肥。记粉袖银筝，青帘画舫，烟柳春堤。惊风一朝吹散，叹西兴兵火渡人稀。白发龟年尚在，青山贺蓝重归。恰相逢紫蟹黄鸡，犹唱缕金衣。奈狂客愁多，秋娘老去，木落乌栖。无情断桥流水，把年光流尽付斜晖。世事浮生急景，道人抱膝忘机。

风 流 子

咸阳三月火，新宫起，傍锁旧莓墙。见残瓮废砖，何王遗构，荒莽衰草，一片斜阳。记当日，文章开讲握，宝地正焚香。左相按班，百官陪从，执经横卷，奏对明光。至尊微笑含，尚书问大义，共退东厢。忽命紫貂重召，天语琅琅。赐龙团月片，甘瓜脆李，从容宴笑，拜谢君王。十八年来如梦，万事凄凉。

龚鼎孳

字孝升，号芝麓，合肥人。

南柯子

端午前一日社集，和遂初韵。

逝水沧江远，浮云碧汉流。逢时愁上仲宣楼。漫说当年刘表，在荆州。深把菖蒲盏，还胶芥叶舟。隔宵堆怨玉搔头，吊屈湘波何处，此淹留。

望江南

前题

名士会，共泛缕金霞。棋局定谁翻黑白，文章空自绚云霞，
庚信已无家。佳节到，间日好邀遮。荆楚岁时多感慨，秦淮灯
最繁华，风物故园赊。

浪淘沙

湖楼晚坐

乍雨又微晴，湖外山青。屏风六曲护银灯。供奉笔床香一
缕，雪净光明。坐对古先生，病里人清。芳磁碧乳胜金茎。小
艇春莺谁度曲，添注风情。

又

和纬云为杨枝别

花语小长干，玉骨珊珊。风流人似綵云端。相见匆匆还别
去，好梦间关。芳草一春闲，绿到平山。杜鹃催杀乱红前。万
叠千重天不管，烟水弥漫。

满庭芳

季弟孝绩生辰燕集

明月过乡，白头兄弟，欢场又是离筵。黄花紫蟹，风物自年
年。四壁书潇洒，那更说、问舍求田。坐中客，连车结驷，千里诵
豪贤。吾衰今已甚，芳樽翠袖，牵率周旋。算侯封相印，不换
诗篇。让汝青云事业，乌衣巷，簪笏盈前。还相约，五湖烟水，妻
子鹿门。

锁窗寒

闻子规

慢卷红楼，兰缸写影，玉蟾窥户。枝头几点，送到落花风雨。

对青山、泪珠暗抛，断魂说向天涯语。为个人顛顛，丝丝系蓬鬓，十年军旅。春暮，牵衣处。有柳外鹈双，桑间马五。湖光潋滟，消得莺俦燕侣。忆故园、寒食清明，紫骝碧草依旧否？怕人归、满眼斜阳，画角围芳俎。

念奴娇 雨夜再送青藜，叠纬云除夕韵。

疏灯细雨，正客心、萧瑟秋行半矣。青眼高歌人乍别，谁向欢场夺帜。六代江山，五陵衣马，去住今宵里。更阑酒醒，风帆愁见初起。扬袂司马游梁，终军使越，寂寞聊为此。一片郁孤台上月，直接石城潮水。楼榭丹阳，莼羹笠泽，乱搅寒衾寐。翔云回首，棋枰翻尽朝市。

齐天乐 初夏湖楼看雨，用史邦卿韵。载《百家》

烟绕一点如鸥小，冲散碧波来去。蝶老韩凭，花辞谢豹，偏下恼人春雨。青螺几许，尽镜暝屏遮，梦迷遥渚。一半楼台，酒旗低卷画中树。依然寒食院落，柳塘蛙鼓畔，榆钱青聚。乍改轻衫，还熏密坐，猜杀双栖红羽。云连绣柱，任门外芜香，屐痕多阻。青绝空濛，前人真好语。

风流子 春明寄忆 载《百家》

相思明月社，推桃叶、一代水边楼。忆黛比岫遥，花和人瘦，玉团屈戌，珠写箜篌。销魂别，泪如巫峡雨，心逐广陵舟。乳燕幕开，锦笺难记，蜜蜂房闭，香粉都收。红窗携纤手，双双把鸳盟，订在新秋。只道霎时金屋，管甚间愁。怅□生绮陌，谁家弄笛，露凉小苑，何处藏钩。七夕看看过了，梦见还羞。

大酺和秋岳春忆

忆柳如烟，乌啼月，江左瑯琊何处。高楼红树里，有银筝纨扇，与花相妒。六代莺声，三山草色，曾记游人来否？芳岫随云散，悔东华走马，此行原误。更风满败荷，日斜横笛，燕穿飞絮。

包胥无一旅。看公等、歌舞夸南渡。为问取、夷吾往矣，祖逖何如？绣芙蓉、那能频顾？梦逐江流去，还懊恼、数峰遮住。料难到、家山路。菱花怜我，萧索长卿非故。倩谁百斤买赋？

曹溶 字鉴躬，号秋岳，秀水人

满江红钱唐观潮

浪涌蓬莱，高飞过、宋家双阙。飘桂子、水晶宫里，谁冲怒发。点点征骖多卸了，海门击鼓青初发。似万群、风马骤银鞍，神州裂。江妃笑，堆成雪。鲛人舞，团如月。正危楼惊起，晚来愁绝。成上湖山留不住，乱涛穿到蛟门歇。看吴雄、未死报仇心，秋时节。驱同帆

如梦令亭上

阁外流莺新弄，池畔垂杨旧种。唤起惜春人，春去愁肠谁共。相送！相送！过雨落花如梦。

酷相思

象板何须歌艳句？又烧烛红窗，莫叹今古，韶华留不住。花

落也，催归去。失意多因杯酒误，辜负春无数。只楼外，江山成客路。鸿断也，书来处。云断也，愁来处。

南柯子

马度离人地，山衔去国程。孤身都似雪花轻，侥幸不知春色过清明。小榭低金镮，重帘冷玉笙。那家沽酒甚多情，又被晚风催送宿沙城。

念奴娇

云署碧桃花

清明已过，怪龙堆、无赖酸风还剪。谁寄武陵花数朵，彷彿画船红染。扇影堤边，粉香人面，倚树闻娇喘。倾城难过，且将塞上帘卷。最爱轻暖轻寒，随风趁蝶，乍喜游心展。宿雨弄姿浑似梦，年少赋情深浅。飘堕旗亭，胭脂万斛，恨事空消遣。今朝酒醒，流莺如诉春远。

满庭芳

李晋王墓下作

殿宿莓苔，罔平蝼蚁，虚寝遥控帘钩。义儿成队，左右列松楸。谁放沙陀雁影，盘仙李、飞入并州。收京阙，赤心家世，长拱紫宸楼。英雄夸亚子，提刀百战，囊矢前驱。渐司香遗庙，埋玉荒丘。事去棠梨漫落，溱沔化、泪点长流。金凫出，优伶天下，麦饭一时休。

贺新郎

答横秋见寿，时行役云中。

玉宇秋如水。为黄花、满襟离恨，雁筝频倚。落日马蹄穷塞

主，白发一肩行李。铜柱北、曾经脱屣。又挂风旗沙柳外，对磨崖、片石挥毫起。呼屈宋、且休矣。故人相见平安喜。写新词、龙蛇飞动，牢骚心事。刁斗河山今不闭，敢诧封侯万里。笑老去、疏狂未已。范蠡湖边莼菜熟，肯羊裘、敝尽车生耳。痛饮酒、真男子。

水龙吟

五日，袁若遗太守招观南湖竞渡。

一年莺外时光，藕花将满南湖路。绿阴斜带，层层珠箔，惹人深处。倚遍层楼，共移清景，听他萧鼓。怅吴霜染鬓，难簪艾叶，佳梦遂、奔驹去。 刚觉山川如故，别灵均、渐凋兰杜。红情待续，小吟清夏，谁传纨素？徐挂轻帆，此身宜称，闲风浪雨。算来归未得，盟鸥七泽，被杯中误。

双双燕

出倒马关

望恒岳近，恰青割燕台，赭连并域。金笳昼惨，步绕古墙西北。谁刈牵衣乱棘，恐卧虎、潜藏路侧。城边野水飘花，略把春情分得。 念欲，凌风直入。怪碎石当门，紫骝无力。酒家何处？别绪已填胸臆。遥数鸿飞不息，托相问、江南山色。关外好月增寒，旅帐且垂一刻。

落灯风

秋怀

绿老簾纹吹欲皱，起折篱花清自嗅。雁阵警寒塘，西风舞、黄河放溜，真是归时候。挑灯乡信裁初就，思小楼、歌残红豆。罗带系同心，为关山、泪痕还又，月与人同瘦。

金明池代邸

雁宿朱扉，龙迷碧瓦，人散落花无力。遥想像、宫楼深处，对银河舞回夜色。棠梨影、飘到空城，似倦昼、罗扇当年寒食。问绿绕金铺，浪游何地，宝玦珊瑚谁识。骏马千行旧珠唤，勒翠袖双扶，踏歌如织。飞雪起、平台未赋，但醉语、铜壶频侧。好韶光、无计留他，剩断镢墙阴，关山春黑。看玉宇尘生，边愁满眼，杜宇声声天北。

宋琬 字玉叔，号荔裳，莱阳人。

踏莎行雁

枫落潇湘，雪深幽翼，西风吹老芦花穗。捣衣时节却飞来，一声才断千行泪。带雨还飞，飘零无次，萧萧清影和云坠。郎边莫道少书来，长空写尽相思字。

沁园春送孙无言归黄山

镇日思归，临水登山，云胡不归？羡君诚高士，堪五湖长；予其逋客，愧北山移。结偏贤豪，厌闻歌管，十载扬州梦已非。家何在？有珠帘云海，雪窦烟扉。年年车马逶迟，空折尽、隋堤柳几枝。笑故园三径，桂兰频老；层峦万叠，猿鹤长啼。或问先生，笑而不答，待满词人饯别诗。真归矣，任山灵见诮，百罚奚辞。

曹尔堪字子顾，号顾庵，嘉善人。

点绛唇江村

苦是春阴，桃花半落江村暮。垂杨千树，缥缈渔船渡。青
满田畴，难认牛羊路。溪边步，野鸥飞去，只爱无人处。

鹧鸪天野塘即事

蟹舍鸡栖共一椽，千竿修竹弄晴烟。鸟声都在征鼙外，兵气
犹缠大角边。书案净，杂花妍，种鱼栽藕野桥偏。木香吹雪人
闲坐，读罢庄生骈拇篇。

蝶恋花将发广陵，留别穆倩于皇无言。

骊唱催人秋未暮。两鬓霜华，只为浮名误。三五婵娟垂白
露，一鞭竟别扬州去。尊酒犹思良夜聚。小店晨鸡，月落馀烟
树。回指江桥堤畔路，油幢乌榜年年度。

满江红长安思秋

花柳萧疏，寒信早、青霜欲落。看塞北、飞鸿噉噉，乱云漠
漠。黑闼垒前鼋兔走，黄金台畔苍鹰掠。酒垆旁、击筑者何人，
悲风作。驱不散，簷间雀。招不下，天边鹤。叹江南秋色，芙
蓉池阁。陶写纵凭丝竹妙，公卿可比山林乐。鬓添星、空说玉
阶，高吟红叶。

王士禄 号西樵

天仙子

河满不堪临别听，鲁酒醉来客易醒。持依只问几时来，频揽镜，怜光景，此意似君能暗省。离绪最愁窗色暝，明月又还窥瘦影。空房应是怯孤眠，风欲定，钟初静，踏遍合欢廊下径。

邹祗谟 字訐士，号程村。

鹊桥仙

轻暖轻寒，不晴不雨，辜负韶光九十。落花飞絮两无情，伏千尺、游丝作合。涂抹东西，飘零南北，从此扁舟一叶。梦回始觉未归人，恨一点、窥人明月。

鱼游春水

十五盈盈小，投钿盒心烟缭绕。流连辛苦，不道佳期竟杳。靡芜巷里人何在，豆蔻花中春色老。泪落天涯，断肠多少。极目年年芳草，间绣阁玉娥不扫。何事尺素传来，征鸿悄悄。侧侧轻寒白日过，濛濛细雨黄昏早。酒醒更兰，数声啼乌。

燕山亭 咏汉宫秋，用宋道君见杏花作韵。

青女初裁，素娥长门，冷落金茎注。只有粗娟，琥珀纓裾，艳绝披香蕊女。瑶圃葩芬，更掩映、锦云珠雨。辛苦。见婉约朱栏，不禁幽暮。便是泪染灵芸，著红玉壶中，向人如语。千丝铁网，百宝流苏，傍他海棠何处。留待深秋，恐化作、晚霞归去。

难据。把金剪，甚时重做？

解语花

送李云田往吴门，
迎侍儿扫镜，暂还白下，时扫镜有疾。

吴云不断，楚雨偏神，珍重相怜意。绣纬松倚乌丝句，偷写
樱桃小婢，学梳时髻。才做出、昵人情思，问何时、持楫相迎，笑
看银烛蕊。寄语鱼笺子细，但身如弱柳，三眠倦起。泪痕如
水，几番看、越罗衫底。为伊屈指，也得、数中萧史。更莫教、
好梦轻圆，胜业坊前李。

陈维崧

字其年，宜兴人。

甘州子

新霁，同南耕散步原白，
园亭主人不在，题壁而去。

铜环半面湿蝦蟆，鹦鹉睡，懒呼茶。胭脂新湿小窗纱。柳线
渐胜鸦，无人到，开偏一园花。

减字木兰花

上巳后一日，途次涪州。

花红草绿，昨日浓春经阮曲。碎雨零烟，今日愁人过涪州。
三春去半，半付邮亭如驿馆。溱洧潺湲，上巳无人出采兰。

凤衔杯

弱柳丝丝街前漾。正初学、小蛮腰样。有隔水红墙，翠楼倒
映墙头上。听楼内、三弦响。恰重经，人已往。帽簷斜、倚风
凝想，只似梦如烟，柳花扑地漫天放。寻不出、伊门巷。

满江红咏雪

雪洒彤墀，看帝里、风光不恶。恰喜是、银装绛灌，琼雕卫霍。粉椽班中年尚少，玉儿宫里腰初约。更太平、天子坐当中，帘垂著。御沟畔，争寒雀。宝鼎外，山呼却。喜臣心似雪，朕之良药。瑟瑟六花笼翠握，冷冷万点敲金钥。问鹓行、谁擅郢中才，从头索。

满庭芳题顾梁汾舍人扈驾诗后

万乘旌旗，千宫羽猎，翠华绝塞重经。珠鞭玉靶，日黑虎风腥。羨尔金闺年少，陪游幸、凤辇龙庭。霜天晓，柘黄袍出，一骑按秋鹰。至尊亲讲武，火城渐杳，交网犹扃。更北平城外，岭断云横。飞鞚传宣七校，黄羊酒、前队教停。琵琶歇，碧天毡帐，一曲海东青。

水调歌头汾西侯仲谔示我九日纪梦词二阙，依韵奉和。

月落墙边黑，几扇雁门开。苍然西极风雨，都向二陵来。闻说胭脂小伎，能唱横汾旧曲，家傍古轮台。我欲与之语，红粉最怜才。饮醇酒，近妇女，莫疑猜。世间馀子何限，两手底头推。安得飞孤峪口，偕汝吹箫击筑，一日笑千回。绿酒不晓事，有闷未能排。

凤凰台上忆吹箫秣陵怀古

红板桥南，锦衣仓北，金陵从古皇州。记离宫墙外，年少潜

游。忽听九重仙乐，东风细、声度龙楼。依稀认、宁王玉笛，贺老箜篌。悠悠。南朝风景，看几遍桃红，白了人头。算刘郎易老，嬴女难留。三十六宫何在，斜阳外、隐隐离愁。伤心极、後湖菱蔓，一片渔舟。

徵招 送宋性存归吴门

一灯分做还乡梦，君今果然归矣。残月晓风天，暂挽君双袂。柳条今剩几，待折赠、沉吟无计。君到江南，定逢梅放，也应相寄。来夜白沟河，鸡声店、料尔早寒人起。谁念凤城边，有倚兰心事。暮云千万里，留我作、天涯游子。我亦有，苑屋三间，六朝斜照里。

琐窗寒 乙卯元夕东云臣竹逸竹虚

今岁元宵，禁晴架雨，装阴做霭。嫦娥何处，盼断一天冰彩。偏春城、街泥未消，蕙花梅萼徒潇洒。算六街寂静，火蛾罢闹，紫姑停赛。窗外，闲愁人，笑冷淡光阴，岁华虚卖。悵悵坊曲，残雪恹恹还在。记当初、小市夜桥，月明笑语春如海。叹如今、止有东风，乍小吹灯带。

念奴娇 由亳州至归德，途经木兰故里，有祠在焉。

苔垣藓径，见灵旗、玉貌娟然幽处。传是木兰遗庙在，多少神弦赛鼓。绣袷蛾眉，红粧猿臂，飒爽真轩举。雌雄扑朔，世间何限儿女。今日满目关山，极天士马，杀气连营苦。安得月明飞锦缴，压倒萧娘吕姥。娘子军空，女郎祠圯，俯仰悲今古。空墙坏壁，画衣剥落如雨。

齐天乐

容若绿水亭观荷，同对岩、荪友、竹垞舟次西溪作。

分明一幅江南景，恰是凤城深处。野翠罗罗，嫩晴历历，扑到空香万缕。早村人语。是柳下沟塍，篱边儿女。稻叶菱丝，隔纱长作打窗雨。莲房箭镞漫簇。西洲都盖满，睡鸭新乳。碧瓮回廊，黄泥小灶，几斛冷泉亲煮。倚兰凝佇。记罨画东头，旧寻诗路。招个烟樵，飘依溪畔去。

高山流水

即席别吴门诸子，偕园次返梁谿，并呈伯成先生。

西风落拓阖闾城。有苗依、白蛤红筍。细雨落簷花，吴王宫外雞鸣。屏当好、嫩橘鲜橙。瓠如玉，乳花雪浪齐倾。三两狂夫，趁筍琵琶未歇，促拍调俱成。闲评。相逢作达耳，人世事、落絮浮萍。枫桥下、几船夜火，一孤寒更。奈酒醒、人又遽离程。早潮平，报道山泉待我，凉梦先萦。尽残年渔簑，茶灶寄浮生。

沁园春

经朱仙镇

古镇朱仙，跃马经过，令人暗惊。看黄尘扑面，闾阎栉比；清波极目，舟楫充盈。南控陈桥，西通尉氏，彷彿当年古汴京。停鞭问，怕沙冲地坼，浪啮堤平。谁河绣拱雕甍，有庙貌、巍峨市口横。是鄂王故事，丹青未老；赵家遗恨，金铁争鸣。三月觞箫，一天社鼓，走赛仍多旧日伦。抠衣拜，欲题诗未许，泪满长缨。
蕤音萌

又月夜渡江

粉月一规，雪浪千条，何其皓然。正稀微吴语，狻狸城下；参差楚火，胡豆洲边。忽听江楼，谁吹横笛，今夜鱼龙距稳眠。推篷望，见秣陵似梦，瓜步成烟。扬州更鼓遥传，记小杜、曾游是昔年。奈迩来情事，鬓丝禅榻；当年况味，绿竿红弦。万古精灵，六朝关塞，都在螺矶年渚前。吾长啸，把一杯在手，好个江天！

贺新郎 汝州月夜，被酒感怀董二。

今夜清辉苦。真醉矣、人生有几，关山如许。极目海天挥一碧，回首家乡何处。总则是、年年羁旅。脱帽凭阑何限恨，倚风前、细把寒更数。谁更打、严城鼓。无端忽忆疏狂侣。曾记得、乌衣巷口，别来如雨。明月也知千里共，照尽秦楼楚戍。应渐到、故人黄土。只恐白杨和月冷，比人间、更有销魂处。汝河水，白如乳。

摸鱼儿 莼

忆家乡、此时节物，四围槲叶攒锦。沿湖小弄莼丝滑，已觉水香微渗。论食品，应不数、鸡苏羊酪侯门藩，流涎那禁。伴玉脍鲈腮，雪花盐豉，微雨小桥饮。长安道，惆怅愁潘瘦沈。谁恹滚雪初霁。粘匙凝碗知何限，绝忆吴娘烹饪。浑未审，笑洛下、张翰归也还由恁。思他则甚？拚一夜西风，五湖船上，倦觅绿簑枕。

河渚神 临津古庙

石竹响飕飕，一行陇断荒丘。无人野渡水争流。土城蔓草

含愁。古庙阴森凉气泻，枫叶映来都赭。门外寒涛暗打，错疑萧鼓村社。

探春令 咏窗外杏花，系叔祖殿元公旧宅。

崇仁宅靠善和坊，旧雕阑都坏。问玉楼、人醉今何处，只一树、花还在。红香笼帽归鞭快。更何人能戴？到如今和了，满城微雨，频上街头卖。

雨中花 雨窗咏梅

连日春工寒勒住。绣不满、枝头娇嫣。见一点胭脂，半廊香雪，开在无人处。漫倚画帘垂玉筯。我含笑、细为花数。算四海青衫，六宫红粉，几阵风和雨。

归田乐引 题王石谷晴效散牧图

散牧凉秋月，或树根、痒而摩者，或饮寒湫窟。渡者人立者，归者、鸣者，喜则相濡怒相齟。矜秋露毛骨，邛首森然如陵阙。绿崖被坂，亏蔽满林樾。驰一塞马七，豕牛羊百三十，牧笛一声西日没。

洞仙歌 汜水县虎牢关作

积铁苍然，关势临崖倏。崕绝东京好门户。挽藤萝、月黑谁恐行人，落叶卷，声似牢中吼虎。无情惟洛水，日夜东流，不为愁人带愁去。寂寞北邙山，苦对西风，排一派、唐陵汉墓。任吊古、伤今已无人，只霜打棠梨，暗啼红雨。